

## ROMUDEENŃ

Baade píngi né durunkεrimε 1:1-3:20

Lán Luda è tó yā bɔ́nyo nna nà 3:21-4:25

Kuuna gbě dufunɔ ũ Kirisi guu 5:1-8:39

Yā kè Ludaa e wεtεε Isarailinɔ musu 9:1-11:36

Yesudeenɔ yákεna 12:1-15:13

Pɔlu ikpammana 15:14-16:27

### *Pɔlu ikpana Romudeenɔ*

<sup>1</sup> Mamɔma Pɔlu, Kirisi Yesu zòbleri, Luda ma sisi à ma diε a zìri ũ, baaru nnaa <sup>2</sup> kè à gĩake à à lé gbè a annabinɔne aɔ kè à yān kpàri ũ. <sup>3-4</sup> À Né Yesu Kirisi wa Dii yān baaru nnaa pì ũ. À gběnteekeε guu à bò Dauda borii guume. À ludaninikeε guu à fεena gaan òdɔawe kɔn gbāaao kè Luda Nén à ũ. <sup>5</sup> Kirisi ma gba zé màgɔ de a zìri ũ bori píngine, le aɔ e wà à náane ke aɔ gɔ à yāmarinɔ ũ le à tó bɔ. <sup>6</sup> Á kú gbě kè Yesu Kirisi n sísì à n sénɔ té se. <sup>7</sup> Ma takada kèkii kèare, a Romudee kè Ludaa yeazi à a sisi a gɔ à gbènɔ ũ píngi. Luda wa De kɔn Dii Yesu Kirisio gběkeε keare à a gba aafia.

<sup>8</sup> Káaku gĩa ma Luda sáabu kè Yesu Kirisi gāzĩ a píngi yā musu, kè a ludanaanekεna dà andunala píngi yānzi. <sup>9</sup> Tó mée adua keε gurɔ píngi, a yā è sāmaguro. Ludan ma sèedadee ũ. Àpin mée dɔɔzi kɔn nòseo do mée à Né yā baaru kpaa. <sup>10</sup> Mεègɔ wée kea à zé kekεme lán à yezi nà, le mà e mà mó a gwa sa. <sup>11</sup> Ma wéesialena nii e ma deε maamaa, le mà e mà Luda Nini gba ke daagu a kāsápeεna yānzi, <sup>12</sup> le a ludanaanekεna kɔn ma pɔo e à wa baade gba

swè. <sup>13</sup> Ma gbēnŃ, má yezi àgŃ dŃ kè mēègŃ gurŃŃ diēē gēn baaagŃ mà mŃ a gwa, le mà a zīi gbè e a té lán má è bori pāndenŃ té nà, mŃde ai tia mēē zé ero. <sup>14</sup> GirikiyāmarinŃ kŃn GirikiyāmarisaideenŃ n pīngi, dŃrinŃ kŃn dŃrisaideenŃ n pīngi, n yā gŃ ma yā ũ. <sup>15</sup> Beee yānzi ma mē wà mà baaru nnaa pì kpá a RomudeenŃne se. <sup>16</sup> Mēè wí de kŃn baaru nnaa pì yāoro, àmbe gbāaa kè Luda è gbē kè aŃŃe à náane kēenŃ mì sío ũ, atēnsa YudanŃ, n gbera bori pāndenŃ. <sup>17</sup> Baaru nnaa pì è owe lán Luda è tó yā bŃnyo nna nà. À de ludanaanekena yā ũ adome, lán wà kè Luda yān nà wà bè: Gbē kè Ludaa tò yā bŃo nna à náane kè èe kēē yānzi égŃ kuu.

### *GbēnteenŃ né taarideenŃmē Luda kiia*

<sup>18</sup> Zaa musu Luda è a pŃfē pita gbēntee kè n zaakena è zé zŃ yāpuraanenŃa n pākpazina kŃn n zaakenaŃo yānzi. <sup>19</sup> Yā kè weé fŃ wà dŃ Luda yā musu utenañnero, Luda bé à yā pì bŃnŃne gupuraa. <sup>20</sup> Zaa gurŃŃ kè à anduna kàē, à gbāaa kè è yāaro kŃn à ludakēē kè wè e kŃn wéēoroŃ bŃ gupuraa à zīinŃ guu wásawasa. Beee yānzi gbēnteenŃ agbaakpana vīro. <sup>21</sup> AŃŃ Luda dŃ, mŃde aŃè bēē líne a zéa wà à sáabu kpáro. N laasuunŃ kè pā, ben aŃ gŃ gusiaan n mīsai yānzi. <sup>22</sup> AŃ n zīnda diē ŃndŃrinŃ ũ, ben aŃ gŃ mīsaideenŃ ũ. <sup>23</sup> AŃè dŃnzi kē gbēntee kè aŃè gaanŃ kŃn bāanŃ kŃn nŃbŃnŃ kŃn pŃtaa'onkuseanŃ takane Luda kè è garoo gēē ũ.

<sup>24</sup> Àmbe à tò Luda n kpá gbāsīkenazi, le aŃ wísaiyā kē kŃŃ, lán aŃè à ni de n nŃse guu nà. <sup>25</sup> AŃ Luda yāpuradee lendee kpà kŃn egēeo. AŃè dŃnzi kē

Luda pókɛnanɔnɛ wà dɔ́nzi Luda kè pó píngi kè g̃ɛ ǔ. Aubarikadeen à ǔ gurɔ píngi! Aami.

<sup>26</sup> Beee yānzi Luda n̄ kpá wísaiyā nidɛnaa. Baa n̄ nɔgbɛnɔ yā kè wè kɛɛ lendeɛ kpà kɔn yā kè wè kɛrooo. <sup>27</sup> Lɛmɛ se gɔgbɛnɔ yā kè wè kɛ kɔn nɔgbɛnɔ tò, aɛè lugakɔzi. Gɔgbɛ kɔn gɔgbɛo è wísaiyā kɛ kɔo aɛè à gbè e n̄ zīndaa n̄ sāsāna lén. <sup>28</sup> Zaakɛ aɔɔe we wà zè kɔn Luda dɔ́naoro, ben à n̄ laasuu kè lɛkpɛɛ, lɛ aɔ yā kè dɛ wà kɛroonɔ kɛ. <sup>29</sup> Yā zaa píngi pèkɔrɛm̄ma: Nòsɛ pāsī, wéekaka, kɛna kɔo ñi, nòsɛgɔaanɔ, gbɛdɛna, swèe, gbɛblɛna kɔn mɔnafikikɛnao. Kɔmɔtɔdeenɔn n̄ ǔ, <sup>30</sup> gbɛyakarinɔ, Luda ibɛɛnɔ, gbɛ takiikɛrinɔ, ỳkɔdeenɔ, ñadārinɔ, zaa laasuulɛrinɔ, de kɔn dao yāmarisaideenɔ, <sup>31</sup> m̄isaideenɔ, nāanesaideenɔ, gbɛyākɛrisaideenɔ, sósobisaideenɔ. <sup>32</sup> Aɔɔ dɔ kè Ludaa diɛ kè yā beee taka kèrinɔ kà wà n̄ dɛdɛ, mɔde aɛè zɛ kɔn à kenano adoro, aɛè té ká à kèrinɔmmɛ dɔ.

## 2

### *Luda é yākpaɛ kɛ a zéa*

<sup>1</sup> Beee yānzi mm̄n kè nɛè gbɛ pānde taari ee, n̄ agbaa vī n̄ kpáro. Tó n gbɛ pānde taari è, n n zīnda dà yāmmɛ, zaakɛ n gbɛtaari'eri nɛè kɛ lɛ se dɔ. <sup>2</sup> Wá dɔ kè Luda yākpaɛkɛna kɔn yā beee taka kèrinɔ kuu a zéamɛ. <sup>3</sup> Mm̄n kè nɛè yā beee taka kèrinɔ taari e, ben nɛè kɛ lɛ se, nɛè daa né bɔ Luda yākpaɛkɛnan yó? <sup>4</sup> Ke nɛè dɔkɛɛ kɔn Luda ñnakennɛna bítao kɔn à mɛnao kɔn à sùuomɛ? N̄ dɔ kè Ludaa e à nnaa kɛnnɛ lɛ n̄ n nòsɛ liɛ yānzinloo? <sup>5</sup> N swāgbāaa kè, nɛè nòsɛ liero, nɛè pɔfɛ kaakɔanzi ai Luda pɔfɛpitammagurɔ zī, tó Luda yākpaɛkɛna kɔn gbɛnɔ a zéa bò gupuraa.

<sup>6</sup> Eé fīa bo baadene a yākenaa. <sup>7</sup> Gbē kè aṣṣe gakui kōn bèeō kōn mēvāsaio weteε bensō aṣṣe à maaa keε kōn menaonṵ é wēndi kè è yāaroo e. <sup>8</sup> Gbē kè n zīnda poyeziyā e dōṅne ae aṣ gi yāpuraazi aṣṣe té à zaaazinṵ sō, Luda é pofē kōn pētēo pitaṛma. <sup>9</sup> Wéētamma kōn wāwāao é zaakeri pīngi le, atēnsa Yudanṵ, n gbera bori pāndenṵ. <sup>10</sup> Luda é maakeri pīngi gba gakui kōn bèeō kōn aafiao, atēnsa Yudanṵ, n gbera bori pāndenṵ. <sup>11</sup> Zaake Luda è gbēke wée gwaro.

<sup>12</sup> Gbē kè durun kè Musa doka dōsai é kaate le doka pī sai. Gbē kè durun kè nana doka pī zī sō, Luda é yākpae keo doka pī musume. <sup>13</sup> Èe ke gbē kè èe doka maa kōn swāo bé à maa Luda kiiaro. Gbē kè èe zīi keea bé eé bo maa. <sup>14</sup> Tó borii kè aṣ Musa doka dōroonṵ yā kè kō sio kè kōn n zīndao, aṣṣe doka vī n zīndaame. <sup>15</sup> Aṣṣe dōṅawe kè yā kè kú doka pī guu kú n nōsemme. Aṣ laasuu e yāpura kpaaa dō, zaake aṣ laasuu mēn dorō, à kenṵ è n da yān, à kenṵ è n bōn. <sup>16</sup> Lemε yākpaekegurṵ zī Luda é yākpae ke kōn gbēnteenṵ yā kè utena aṣ nōsen musu Kirisi Yesu gāzī, lán baaru nnaa kè mée kpaā ò nà.

### *Yudanṵ né dokadarisaideenṵmε*

<sup>17</sup> N Yuda ina, n ze kōn n Yudakeεo, n Musa doka náane vī, née yōkō keε Ludao. <sup>18</sup> N Luda poyezi dō kōn yā kè zé vīo, kè wà doka pī dàdanne yānzī. <sup>19</sup> Née daa n de vīanṵ wéedeε ũ, gbē kè aṣṣe kú gusiaa guunṵ fitia ũ, <sup>20</sup> wéesiadeenṵ yādanneri ũ, gbē dufunṵ aufaa ũ. Née daa Luda dokan dōna kōn yāpuraao mi ũ. <sup>21</sup> Mmōn kè neε yā da gbē pāndenṵne, bōyānzī neε da n zīndaneziroo? N bè wàton kpāi oro, mpi neε o sōsō? <sup>22</sup> Neε be wàton zina kero, neε zina ke sōsō? Neε kya ká tāanṵn, neε n kpé pōnṵ kpāi o sōsō? <sup>23</sup> Neε

ỳkõ ke Luda doka musu, ben n doka pì danasai è Luda tó yaka. <sup>24</sup> Zaake a yānzin bori pāndenŃ ègõ Luda tó zaaa siizi lán wà kè à yān nà.

<sup>25</sup> Tó n Luda doka kūna, ben bāngukena àre vīnne. Tó nēe à yā da sōro, n sáa kōn gefōdeenŃme. <sup>26</sup> Tó gefōdee Luda dokanŃ kūna, Luda é gefōdee pì gwa sáa kōn gbē kè bāngu kèoroo? <sup>27</sup> Baa tó n doka takada pì kūna bensō n bāngu kè, tó nēe doka pì daro, bāngukerisaidee kè kūna é tó yā danla. <sup>28</sup> Kuuna Yuda ũ yāpuraa né mēbaayānlo, lēme bāngukena yāpuraa né mēbaayānlo se. <sup>29</sup> Kuuna Yuda ũ yāpuraa né nòsguueyāme, lēme dŃ bāngukena yāpuraa né nòseguuyāme se. Luda Nini zīime, èe ke doka takada yānlo. Luda bé è gbē beee taka sáabu kpá, èe ke gbēnteenlo.

### 3

<sup>1</sup> Kaarana kpāreen Yudakee vīi? Àre kpāreen bāngukena vīi? <sup>2</sup> À kaarana vī bíta yā píngi guu. Káaku gīa Luda a yā nānne n zīime. <sup>3</sup> Kè aō gbēkenŃ náane vīro, bón beee vīi? Aō kuuna náane sai é Luda náane gboroo? <sup>4</sup> Auo! Lenlo! À tó Luda gō yāpuraa vī, baa kè gbē píngi né egedeeme, lán wà kè Luda yān nà wà bè:

Tó n yā ò, n yā égõ zé vī,

tó n yākpae kēnyo, n yā é ble.

<sup>5</sup> Tó wa zaakee è Luda maakee bŃ gupuraa, bŃ yān wé oo? Wé be Ludaa maaro kè è pōfē pitawa yānzin yŃ? Mée oo lán gbēntee ona bàme. <sup>6</sup> Auo! Lenlo! Tó Luda yāze vīro, à kè dia eé fŃ à yākpae ke kōn andunao? <sup>7</sup> Gbēke é be, tó a egedekee e Luda

náane kaara bensõ èè à tó bɔɔ, b́yānzín eé yā daala lán durunkeri bàzi? <sup>8</sup> Tó n̄ ò lε néè bee wà yā zaaa κε, yā maaa é bɔn. Gbēkenɔ ma tó zaaa sì wà bè len mèè o lε. Luda yādanlana kō sìnyo.

### *Gbēkee maaro*

<sup>9</sup> Tò! Wa Yudanɔ wá sàɔn yó? Lenlo fá! Zaake ma Yudanɔ kōn bori pāndenɔ b̀b̀b̀ n̄ dàn n̄ píngi k̀, aõ píngi né durun z̀n̄mε. <sup>10</sup> Wà k̀ Luda yān wà bè: Gbēkee maaro, baa m̀n̄ do.

<sup>11</sup> Làakaride kee kuuro, Luda kii weteri kee kuuro.

<sup>12</sup> Aõ sàsã n̄ píngi aõ g̀ò d̀r̀o sai, yāmaakeri kee kuuro, baa m̀n̄ do.

<sup>13</sup> Aõ k̀to dε lán mira wēna bàme, aõ lénnaa kásañne,

aõ légbε né pitigoo sewεεmε,

<sup>14</sup> yā ñi kōn gbēkanao n̄ lé pà.

<sup>15</sup> Aõ wāa kōn gbēdenao,

<sup>16</sup> aõ kisia kōn pɔsiaao kpánzi,

<sup>17</sup> aõ aafia zé d̄ro,

<sup>18</sup> aõ wée èḡo Luda wí v̄ro.

<sup>19</sup> Wá d̄ k̀ Luda doka píngi dε gbē k̀ aõ na doka pì ɔzĩn̄ pó ũmε, lε gbē píngi lé ḡo nak̄ana, anduna gbē píngi ḡo taaridee ũ Luda kiia. <sup>20</sup> Zaake gbēke é bɔ maa Luda kiia doka pì k̄na yānz̄iro. Luda doka bé è tó wà durun d̄.

### *Dian Luda è tó yā b́nyo nna nà*

<sup>21</sup> Dian Luda è tó yā b́nyo nna nà b̀ gupu-raaa sa, lán à yā kēna Musa doka kōn annabinɔ takadanɔ guu nà. Èe κε à doka k̄na yānlo. <sup>22</sup> Luda è tó yā b́nyo nna Yesu Kirisi náanekena yānz̄imε. Gbē k̀ èè à náane keε píngi pómε. Gbēkee bɔna adoro, <sup>23</sup> zaake baade píngi durun k̀, aõ k̀sã Luda

gakuizi. <sup>24</sup> Luda è tó yā bŃnyo nna gbaa ũ a gbēke yānzi Kirisi Yesu kè à n bŃ gāzī. <sup>25</sup> Àpin Ludaa kpà durun agbaakpabŃ ũ gbē kè aŃŃe à aru náane kēenŃne, le à ɔɔba baade píngine kè eè yā ke a zéame. À mena yā, èe durun ziinŃ yā daro, <sup>26</sup> ben à òɔbañne tia kè eè yā ke a zéa. Dian Luda è yā ke a zéa nànwewe, bensŃ è tó yā bŃ kŃn Yesu náanekerinŃo nna.

<sup>27</sup> GbēnteenŃ é fŃ wà ãa dā dŃŃ? Bee é sí kero. BŃyānzii? Zaake à de zíkēna dokaa yā ũro, ludanaanekēna yāme. <sup>28</sup> Zaake má è yā è bŃ gbēo nna Yesu náanekēna yānzime, zíkēna dokaa baasi. <sup>29</sup> Luda né YudanŃ Ludame ntēéŃ? Bori pāndenŃ Ludan seroo? Eè, bori pāndenŃ Ludame dŃ. <sup>30</sup> Zaake Luda mèn dome. Eé tó yā bŃ kŃn gbē kè bāngu kèo nna a náane kè èe kee yānzime, bensŃ eé tó yā bŃ kŃn gefŃɔdeeo nna a náane dŃnkŃ pì musu. <sup>31</sup> Wée doka daa pŃke ũro ludanaanekēna yānzin yŃ? Lenlo, wée gbāaa kpaame.

## 4

### *Yā bŃna Ibraĩ nna ludanaanekēna yānzi*

<sup>1</sup> Wa YudanŃ, wé be diame wa dezi káaku Ibraĩ yā musuu? <sup>2</sup> Tó Ludaa tò yā bŃo nna yā kè à kè yānzi, le à ãadāyā è, mŃde èe fŃ à dā Luda aezĩro. <sup>3</sup> Dian wà ò nà Luda yān? Wà bè Ibraĩ Luda náane kè, ben Ludaa tò yā bŃo nna a náane kè à kè yānzi. <sup>4</sup> Fĩabona zĩkerine né gbēkekēnenanlo, à asaiapŃme. <sup>5</sup> Baa tó gbē e yāke kero, tó èe Luda kè è tó yā bŃ kŃn taarideenŃ nna náane kee, Luda é tó yā bŃo nna a náane kè èe kee yānzi. <sup>6</sup> Dauda gbē kè Ludaa tò yā bŃo nna yākekesai aubarika'ena yā ò à bè:

7 Aubarikadeenŋ gbē kè Luda pó kù ní taarinŋla à  
 ní durunŋ kḗmmanŋ ũ.

8 Aubarikadeen gbē kè Dii é à durun yā daroo ũ.

9 Aubarika beee né gbē kè bāngu kè pómē adó, ke gēfōde pómē dō? Wà bè Ludaa tò yā bō kōn Ibraĩ nna, kè à à náanē kè yānzi. 10 Ibraĩ de diamē gurō kè Ludaa tò yā bōo nnaa? À bāngukēnaś ke gēfōdeemē? Èe bāngu kero, gēfōdeemē. 11 Ben à bāngu kè sèeda ũ kè Ludaa tò yā bōo nna à gēfōdekegurō yānzi. Len à de gēfōdee kè Ludaa tò yā bōnyo nnaanŋ dezi ũ le ní píngi ní ludanaanekēna yānzi. 12 À de gbē kè aō bāngu kēnŋ dezi ũmē dō. Èe ke aō bāngukēna yānzinlo, kè aō té wa dezi Ibraĩ kēsēgbēzi yānzimē kè à Luda náanē kè a gēfōdekegurō.

### *Dian Ibraĩ Luda náanē kè nà*

13 Luda lé gbē Ibraĩnē kōn à boriinŋ à bè anduna é gō ní pó ũ. Èe ke à doka kūna yānzinlo, kè Ludaa tò yā bōo nna a náanē kè à kè yānzimē. 14 Tó gbē kè aō doka kūnanŋ bé weé kí ble, ēndē ludanaanekēna àre vīro bensō Luda légbēna kè famma, 15 zaake doka è mó kōn Luda pōfēomē. Guu kè doka kúnlo, taari ègō kuuro. 16 Beee yānzi pó kè Luda a lé gbē ena né à náanekēna yāmē, le àgō de à gbēke yā ũ. Légbēna pì sō né Ibraĩ bori pìnŋ pómē ní píngi, èe ke gbē kè aō Musa doka kūna ntēenŋlo, kōn gbē kè aōe Luda náanē kee lán Ibraĩ bānŋomē dō. Ibraĩ né wa píngi dezimē. 17 À de wa dezi ũ Luda kiia, lán wà kè Luda yān nà. Luda bè a à diè bori pariinŋ dezi ũ. Ibraĩ Luda kè è wēndi kpá gēnŋa à tó pó kè kuu yāroonŋ gō kuu náanē kè. 18 À Luda náanē kè



à wée dò pò kè gbēke wée dōziroozi, ben à gò bori pariino dezi ũ lán Ludaa òne nà à bè, lème à boriino égō de le. <sup>19</sup> Ibraī kà lán wè basōroo taka bà. Baa tó à laasuu lè a gōgbēkeboṣaia kōn Sara né'iso tatanao, à ludanaanekena e busaro. <sup>20</sup> Èe seka ke lé kè Ludaa gbēnaro, èe gí Luda náane keziro, ben à gbāa è a ludanaanekena à Luda tó bò, <sup>21</sup> zaake à dō kè à yā fēna vīro, Luda é fō à lé kè à gbē pì ke. <sup>22</sup> Beee yānzin Ludaa tò yā bōo nnazi. <sup>23</sup> Wèe yā bōnao nnaa pì kē à mèn doo yānziro, <sup>24</sup> wà kè wamōwa kè Luda é tó yā bōwao nnaano yānzime dō, wamōwa kè wée Luda kè à wa Dii Yesu fēe bōna gaan náane keeno. <sup>25</sup> Luda à kpàmma le à e à wa taarino kēwe yānzime, ben à à fēe wèndio le yā e à bōwao nna yānzi.

## 5

### *Kena nna kōn Ludao*

<sup>1</sup> Lán Ludaa tò yā bōwao nna nà à náane kè wée kee yānzi, wá nnao sa wa Dii Yesu Kirisi gāzī. <sup>2</sup> À náanekena guu wa zé è à gāzī wa gē Luda gbēke kè wá kúo pì guu, ben wée pōnnaa kee kōn Luda gakui kè wá wée dōzio. <sup>3</sup> Èe ke beee adoro, wée pōnnaa kee kōn wa nawēakenao dō, zaake wá dō kè nawēa è mó kōn menao, <sup>4</sup> mena è mó kōn dà maaao, dà maaa è mó kōn tāmaao, <sup>5</sup> tāmaa sō è wa néro, zaake Luda a yenzi dà wa nōsen a Ninii kè à wa gbaa gāzī. <sup>6</sup> Wa gbāasai guu Kirisi gà wamōwa zaakerino gēe ũ gurō kè Ludaa diēa. <sup>7</sup> Gana gbē maaa gēe ũu aagarō. Ke gbēke é we à ga gbē maaa gēe ũ gwēe, <sup>8</sup> ben Ludaa òdōawe dian á yewazi nà, zaake wa durundekēe guun Kirisi gà wa gēe ũ. <sup>9</sup> Lán

yā b̀wao nna nà sa à aru yānzi, wa wa sina Luda pof̄eà à gāzĩ yā o d̀ó? <sup>10</sup> Yā wá ìi k̄n Ludaome, ben wa keo nna à Né gana yānzi. Lán wa ke Ludaο nna nà sa, wa wa m̀sina à kuuna ẁendio yānzi yā o d̀ó? <sup>11</sup> Èe ke k̀ekiime adoro, wée p̄onnaa kee k̄n Ludaο d̀o wa Dii Yesu Kirisi k̀e tò wa keo nnaa gāzĩ.

### *Kirisi yal̄ek̄zina k̄n Adamuo*

<sup>12</sup> Gb̄e m̀en doo yānzin durun g̀e anduna guu, ben durun gaa ì. Lem̄e d̀o gaa kú baade p̄ingia, k̀e baade p̄ingi durun k̀e yānzi. <sup>13</sup> Durun kú anduna guu le Musa doka kp̄e à mó. Gur̄o k̀e doka kuuro, Ludaa e durun yā daro, <sup>14</sup> m̀ode sena zaa Adamua ai à g̀a pé Musaa ga kí bl̄e baade p̄ingia, baa gb̄e k̀e āōe durun ke lán Adamu sāsāna b̀aroon̄o. Adamu né gb̄e k̀e eé mó takame.

<sup>15</sup> M̀ode ludangbaa é sí l̄ek̄zi k̄n Adamu taarioro, zaake lán gb̄en̄o g̀a nà pari Adamu ado sāsāna yānzi, Luda gb̄eke k̄n à gbaao k̀e k̀a gb̄en̄o pari Yesu Kirisi ado gb̄eke yānzi de beeela. <sup>16</sup> Ludangbaa é sí l̄ek̄zi k̄n gb̄e m̀en do durun p̄ioro. Taari m̀en doo p̄i bé à mò k̄n yākp̄aekenao, ben yā v̄e gb̄enteen̄o. Taarin̄o mò k̄n ludangbaao, ben yā b̀ò k̄n gb̄en̄o nna. <sup>17</sup> Lán Adamu ado taari bé à tò gaa mò à kí bl̄e nà, Yesu Kirisi ado yā k̀e à mò bíta de beeela. Beee yānzi gb̄e k̀e Luda gb̄eke k̀e k̀e, k̀e à tò yā b̀nyo nna gbaa ũn̄o é kí ble ẁendi k̀e è yāaroo guu. <sup>18</sup> Beee yānzi lán taari m̀en doo p̄i tò yā v̄e bori p̄ingia nà, lem̄e d̀o maakena m̀en doo p̄i è tó bori p̄ingi b̀o maa le āo ẁendi k̀e è yāaroo e. <sup>19</sup> Lán gb̄e m̀en do swāgbāaa bé à tò gb̄en̄o g̀ò durunden̄o ũ parii nà, lem̄e d̀o gb̄e

mèn do yāmana é tó gbēnŃ bŃ maa pari ɛ. <sup>20</sup> Doka m̀ ɛ taari e àgŃ kaara yānzimɛ, m̀de k̀ durun kàara, Luda gbēkɛɛ kàara de beeela. <sup>21</sup> Lán durun kíblena m̀ kŃn gaaŃ nà, len dŃ Luda gbēkɛ kíblena è tó wà bŃ maa ɛ, wà ẁendi k̀ è yāaroo e wa Dii Yesu Kirisi gāzĩ.

## 6

### *Kuuna Kirisi guu*

<sup>1</sup> Wé be diamɛ? Wé gí wàgŃ durun kɛɛ ɛ Luda gbēkɛɛ e àgŃ kaaran yŃ? <sup>2</sup> Auo! Lenlo! WamŃwa k̀ wá de g̀nŃ ũ durun yā musu, à k̀ dia wégŃ kpɛɛ wàgŃ durun kɛɛ dŃŃ? <sup>3</sup> WamŃwa k̀ wa batisi k̀ Kirisi Yesu pŃ ũunŃ, á dŃ k̀ wá kúŃ à gaa guuroo? <sup>4</sup> Wa gao batisikena guu, wà wa v̄io ɛ wàgŃ kú kŃn ẁendi dufuo, lán Kirisi f̀ɛɛ gaan kŃn a De gbāa gakuio à kuu nà. <sup>5</sup> Lán wa gŃŃ m̀ dŃnkŃ ũ à gaa guu nà, len wé gŃŃ ɛ à f̀ɛɛna guu se. <sup>6</sup> Wá dŃ k̀ wa dà zii gào lía, ɛ wa m̀ durundee kaate wàton zò ble durunnɛ dŃro, <sup>7</sup> zaake gbē k̀ gà bŃ durun yāmmɛ. <sup>8</sup> Lán wa ga kŃn Kirisio nà, wá à náanɛ v̄i k̀ wégŃ kuuŃ dŃ. <sup>9</sup> Wá dŃ lán Kirisi f̀ɛɛ gaan nà, eé ga dŃro, gaa gbāa v̄ia dŃro. <sup>10</sup> Zaake gana k̀ à gà, à gà durun yā musu g̀n dome, kuuna k̀ à kuu tia sŃ, à kuu Luda pŃ ũmɛ. <sup>11</sup> Len apinŃ se, à a zĩnda diɛ g̀nŃ ũ durun yā musu ɛ, égŃ kuu Luda pŃ ũ Kirisi Yesu guu. <sup>12</sup> Beee yānzĩ àton tó durun kí ble a m̀ k̀ eé gaaa a dà zaaa dŃare aɛ dŃro. <sup>13</sup> Àton a m̀gu ke kpá durun-a yāzaakebŃ ũro. À a zĩnda kpá Ludaa gbē k̀ aŃ f̀ɛɛ gaan wà kuunŃ ũ, à a m̀guunŃ kpáa

yāmaakebɔnɔ ũ. <sup>14</sup> Àton tó durun gɔ gbāa vīawa dɔro, zaake á na doka ɔzĩro, sé Luda gbĕkεε.

### *Maakena zɔnɔ*

<sup>15</sup> Dian gwee? Lán wá kú doka ɔzĩ dɔro nà, sé Luda gbĕkεε ɔzĩ, wégɔ kpee wàgɔ durun keen yó? Auo! Lenlo! <sup>16</sup> Á dɔ kè tó a a zĩnda kpà gbĕa ée mì siεεε, á de adee zò ũnloo? Tó durunn a a zĩnda kpàa, é game. Tó a mì siε Ludanε sɔ, é bɔ maa. <sup>17</sup> Wa sáabu kè kɔn Ludao, zaake durun zɔnɔn a ũ yā, ben a mì siε yā kè wà dàare zéazεanε kɔn nòsεo do. <sup>18</sup> A bɔ durun yān a gɔ maakena zɔnɔ ũ. <sup>19</sup> Mée yā pì oo lán gbĕntee yā'ona bà a gbāasai yānzimε. Lán a a mēguunɔ kpà yā pāpākena kɔn yā zaaao zɔnɔ ũ a yā zaa kè nà, len tia dɔ à a mēguunɔ kpá maakena zɔnɔ ũ le a kuuna gɔ adona. <sup>20</sup> Kè á de durun zɔnɔ ũ yā, a bà kú kɔn maakenaoro. <sup>21</sup> Àre kpareen á è yā kè á kè yā kè à kèare wíyā ũ tiaanɔ musuu? Yā pìnɔ mīdena né gaamε. <sup>22</sup> Tia sa lán a bɔ durun yān nà ée dɔɔ Ludazi, a àren kuuna adona ũ, à mīdena sɔ né wēndi kè è yāaroomε. <sup>23</sup> Durun asaia né gaamε, mɔde gbaa kè Ludaa dàwe wa Dii Kirisi Yesu guun wēndi kè è yāaroo ũ.

## 7

### *Wá kú Musa doka ɔzĩ dɔro*

<sup>1</sup> Ma gbĕnɔ, mée yā ooare lán gbĕ kè aɔ Musa doka dɔɔnɔ bà. Á dɔ kè doka iko vī gbĕa gurɔɔ kè à kú wēndionloo? <sup>2</sup> Len doka pì nɔzāree yì a zāa le gurɔɔ kè à kú wēndio. Tó à zā gà, ben doka pì è à gbare. <sup>3</sup> Gurɔɔ kè à zā kuu, tó à gò gɔ pānde pó ũ, weé bene zinakerimε. Tó à zā gāmε sɔ, doka pì à gbàren gwe.

Tó à gò gõ pãnde pò ù sa, beee né zina yãme d̄oro. <sup>4</sup> Len apinò se ma gb̄enò, a ga doka musu Kirisi mè gāzī, ben a gõ gb̄ē kè f̄ē b̄ona gaan pì pò ù, le wà e wà kaarana e Luda pò ù. <sup>5</sup> Kè wa dà d̄owe aε yā, doka bé à tò durun nii wa de wa mè guu, ben wa kaarana è ga pò ù. <sup>6</sup> Tia s̄o wa ga pò kè wa kũ zò ùu pì yā musu, wa b̄o dokan, ben wée d̄oo Ludazi à Ninii zé dufu guu, èe ke doka takada zé ziinlo.

### *Doka k̄on durun-o*

<sup>7</sup> Wé be diamε? Luda doka né durunn yó? Lenlo fá! Doka pì bé à tò ma durun d̄s̄. Tó doka e be wàton pò ni deroro, le má d̄s̄ dian pónidena èḡo de nàro. <sup>8</sup> Durun zekii è Luda yādiēna pì gāzī, ben à tò pò píngi nii ma de. Zaake kè má doka d̄oro, durun demε yāke ūro. <sup>9</sup> Má kuu yā doka sai, m̄ode kè ma yādiēna pì mà, durun vù iin, <sup>10</sup> ben ma ga. Yādiēna kè de à w̄endi kpámaa pì m̄omε k̄on gaao. <sup>11</sup> Durun zekii è yādiēna pì gāzī, ben à k̄eke à ma de yā pì gāzī. <sup>12</sup> Lemε doka pì kuuna adona, bens̄o Luda yādiēna pì kuuna adona, à zé v̄i bens̄o à maa. <sup>13</sup> Yā maaa bé à tò ma gaó? Lenlo fá! Le durun e à b̄o gupuraa, à gaa ìmε yā maaa gāzī, le wà durun d̄s̄ durun ù yādiēna pì gāzī.

### *Z̄ikana k̄on durun-o*

<sup>14</sup> Wá d̄s̄ kè doka pì b̄o Luda kiiame. Mapi s̄o, dàdeen ma ù, má na durun ɔzī. <sup>15</sup> M̄eéḡo yā kè m̄eε keε gbá d̄oro, zaake m̄eε yā kè má yezi mà keε kero, yā kè má yezi mà keroon m̄eε ke. <sup>16</sup> Tó yā kè má kè e k̄s̄ sé k̄on ma p̄oyeziyāoro, ma we kè doka pì maa. <sup>17</sup> Èe ke m̄ambe m̄eε keero, durun kè kú ma guume. <sup>18</sup> Má d̄s̄ kè yā maaa kú ma guuro, ma dà maaro.

Mεègõ yezi mà yã maaa κε, m̄de μεè f̄õ mà κero.  
 19 Yã maaa kè má yezi mà κε, μεè κero. Yã zaaa  
 kè má yeziroon μεè κε. 20 Tó yã kè má yeziroon  
 μέε κεε, èe κε mámbe μέε κεερο, durun kè kú ma  
 guume. 21 Má è tó má yezi mà à maaa κε, à zaaa bé  
 è d̄ome ae. 22 Luda doka bé è κeme nna ma swè guu,  
 23 m̄de má è iko p̄andee kú ma m̄e guu, ègõ z̄i kaa  
 k̄õn iko kè kú ma laasuu guuo, ben má na durun  
 iko kè kú ma m̄e guu p̄i ɔ̄z̄i. 24 Mam̄oma w̄endade  
 ina, dé bé eé ma sí ma m̄e kè ma kpa gaazi kè ɔ̄z̄i?  
 25 Ma sáabu kè k̄õn Ludao! K̄õn wa Dii Yesu Kirisi  
 gb̄aaao. Len má de z̄ò ũ Luda dokane ma laasuu  
 guu le, bens̄o má de z̄ò ũ durun ikone ma dà guu.

## 8

### *Z̄iblena k̄õn Luda Nini gb̄aaao*

1 Yã é v̄ee gb̄e kè āõ kú Kirisi Yesu guun̄o d̄oro,  
 2 zaake kuuna Kirisi Yesu guu Luda Nini kè è w̄endi  
 kpám̄ma gb̄aa ma b̄o durun k̄õn gaao ikon. 3 Yã  
 kè Musa doka e f̄õ à k̄ero gb̄entee gb̄asaik̄e yãnz̄i,  
 Ludaa kè. À a z̄inda Né z̄i gb̄entee ũ lán wam̄owa  
 durundeen̄o bà durun k̄enn̄ena yãnz̄i, ben à wí dà  
 durun-a a Né m̄e p̄i ḡaz̄i, 4 le yã kè doka e wet̄ee  
 ȳapuraa κewa, wam̄owa kè wa dà è d̄owe ae d̄oro,  
 sé Luda Nini. 5 Gb̄e kè āõ dà è d̄õñ̄e aen̄o è làakari  
 d̄o ñ dà yãa, gb̄e kè Luda Nini è d̄õñ̄e aen̄o è làakari  
 d̄o Luda Nini yãa. 6 Dà d̄onn̄ena ae né gaame.  
 Luda Nini d̄onn̄ena ae né w̄endi k̄õn aafiaome. 7 Dà  
 d̄onn̄ena ae né íbetekpana k̄õn Ludaome. Adee è mì  
 sīe Luda dokanero, eé f̄õ sero. 8 Gb̄e kè āõ dà è d̄õñ̄e  
 aen̄o yã è ká Ludanero.

<sup>9</sup> Apinɔ sɔ, a dà è dɔare aɛro, sé Luda Nini, tó à kú a guu yāpura. Tó gbɛ Kirisi Ninii vī sɔro, à de Kirisi pɔ ũro. <sup>10</sup> Tó Kirisi kú a guu, baa tó a mè gà durun yānzi, Luda Ninii deare wɛndi ũmɛ, kè Ludaa tò yā b̀ao nna yānzi. <sup>11</sup> Tó Luda kè Yesu fɛɛ gaan Ninii kú a guu, Luda kè Kirisi pì fɛɛ gaan é wɛndi kpá a mè kè gà p̀ia à Ninii kè kú a guu gāzī.

<sup>12</sup> Beee yānzi ma gbɛnɔ, tɛna wa dàzi né tiasinlo, pɔyɛzimɛ. <sup>13</sup> Tó á té a dàzi, é game. Tó a a yāzaakɛnanɔ mì dè kɔn Luda Nini gbāaaɔ sɔ, égɔ kuu. <sup>14</sup> Gbɛ kè Luda Nini è dɔ́nne aɛnɔ bé wà Luda nɛnɔ ũ. <sup>15</sup> Zaakɛ ninii kè è tó wà zò ble kɔn v̀iaon á èro, Luda Nini kè tò a gɔ Luda nɛnɔ ũun á vī, ben weè wii lé Ludaa kɔn à gbāaaɔ wà be: Baa, wa De. <sup>16</sup> Ninii p̀i è o wa niniine kè Luda nɛnɔn wa ũ. <sup>17</sup> Lán à nɛnɔn wa ũ nà, à túbiblerinɔn wa ũ. Luda túbiblerinɔn wa ũ, wé ble lɛdo kɔn Kirisiomɛ. Tó wa nawɛa k̀eo, wégɔ kúo à gakuì guu.

### *Wéedɔna Luda gakuizi*

<sup>18</sup> Má è wé fɔ wà gurɔ k̀ekii nawɛa lékɔzi kɔn gakuì kè Luda é b̀owe gupuraaaro. <sup>19</sup> Luda p̀okɛnanɔ p̀ingi wéɛ dɔ à nɛnɔ b̀ona gupuraaazi yāana sai. <sup>20</sup> Zaakɛ Ludaa tò a p̀okɛnanɔ g̀ɛ p̀āpākɛɛ guu p̀ingi. Èe ke aɔ pɔyɛzinlo, Luda bé à kè le, le n̄ wéedɔzina guu <sup>21</sup> anduna bɔ yakana kè èè zò bleenɛ guu, gbasaa àgɔ a zīnda vī Luda nɛnɔ gakuì guu. <sup>22</sup> Wá d̄ɔ kè Luda p̀okɛnanɔ p̀ingi e mboo kɔn wāwāao lán n̄'i p̀ó bà ai tia. <sup>23</sup> Èe ke beemɛ adoro, wamɔwa kè wá Luda Nini vī kpégaau ũunɔ, wé mboo kpāi se ai Luda gɔ gá wa mè liɛ à wa sí a nɛnɔ ũ. <sup>24</sup> Luda wa mì s̄i le wà wéɛ dɔ beeezi. P̀ó kè wà è kɔn wéɛo né wéedɔzina yān dɔro. Dé bé è wéɛ dɔ p̀ó

kè à gĩake à èzi? <sup>25</sup> Tó wa wée dɔ pɔ kè wée eroozi sɔ, weègɔ dāa kɔn menaome.

<sup>26</sup> Leme sɔ Luda Nini è dɔwale wa gbāasai guu, zaake wá aduakena dɔ a zéaro, ben Luda Nini è kúe kewe Ludane kɔn mbona kè à yā gè onalaa.

<sup>27</sup> Luda è nɔse guu e bensɔ à a Ninii laasuu dɔ, zaake Luda Nini è kúe ke Luda gbēnɔne lán Ludaa yezi nàme. <sup>28</sup> Wá dɔ kè yā píngi è bɔ maa gbē kè aɔ ye Ludazinɔne, gbē kè à n sísí à n sé lán èe wetee nàno.

<sup>29</sup> Zaake Ludaa diɛ zaa káaku kè gbē kè à gĩake à n dɔno bɔkɔba kɔn a Néo, le àgɔ de daudu ũ dāaro pariino té. <sup>30</sup> Gbē kè à n díe zaa káaku pìnɔn à n sísí, ben à tò yā bɔ kɔn gbē kè à n sísí pìnɔn nna, ben à tò gbē kè yā bɔnyo nnaa pìnɔ gɔ gakui vī.

### *Yenzi kè Ludaa vīwao Kirisi Yesu guu*

<sup>31</sup> Wé o diame yā beeno musuu? Lán Luda zèwao nà, dé bé eé fɔ à kpáwee? <sup>32</sup> Lán èe gí kɔn a zīnda Néoro nà à à kpà wa píngi yānzi, eé gí pɔ píngi naawe gbaa ũ sɔziɔ? <sup>33</sup> Dé bé eé gbē kè Luda n sɛno káara keɛ? Luda bé è tò yā bɔnyo nna. <sup>34</sup> Dé bé eé yā dawalaa? Kirisi Yesu gà, kè de beeelaa à èara à fèe à kú Luda ɔplaazi, èe kúe keeneɛwe. <sup>35</sup> Bó bé eé wa kē Kirisi yenzia? Nawēa ke ĩadamma ke wéetamma ke nɔaa ke takaasi ke kari ke fēdaa, aɔ ke é fɔɔ? <sup>36</sup> À kēna Luda yān wà bè:

N yānzi wá kú gaa lézīzi zaa kɔngɔ ai uusiɛ,  
wè wa diɛ lán sāa kè weé n kòto kpánɔ bà.

<sup>37</sup> Yā beeno guu píngi wá de zīblerila gbē kè yewazi gāzī. <sup>38</sup> Zaake má dɔ sānsān kè gaa ke wēndi ke malaikanɔ ke zīnno ke tia yā ke zia yā ke gbāadeeno <sup>39</sup> ke musu pónɔ ke tɔte pónɔ ke Luda pókɛna



pāndenŋ, aŋ ke é fŋ à wa kē yenzi kè Ludaa vīwaoaro wa Dii Kirisi Yesu guu.

## 9

### *Luda Isarailinŋ sɛna a gbēnŋ ũ*

<sup>1</sup> Mée yāpuraa oo Kirisi guume, mée egeɛ toro. Ma laasuu è wezi kōn Luda Ninio se. <sup>2</sup> Ma pɔsɔiaa kè bíta, ma nòse ègŋ yakana gurŋ pínɡi. <sup>3</sup> Mée fŋ mà wée ke Ludaa à ma kē Kirisia, à láari kema ma Isaraili daanŋ gēɛ ũ. <sup>4</sup> Aŋmōnnōn Luda n̄ sé a nénŋ ũ, à a gakui òɔańne, à bà kúńyo, à a doka kpàńma, à ònzikena dàńne, à lé gbēńne. <sup>5</sup> Aŋ de Luda gbē káakunŋ boriinŋ ũ, bensŋ aŋ borii guun Kirisi kè de gbē pínɡilaa bòn gbēntee ũ. Àmbe Luda kè de wàgŋ à sáabu kpaa gurŋ pínɡi ũ. Aami.

<sup>6</sup> Èe ke yā kè Ludaa ò lèe pānlo, zaake Isaraili gbē pínɡin Isaraili yāpuraa ũro. <sup>7</sup> Èe ke Ibraĩ boriinŋ pínɡi bé Ibraĩ pì nénŋ ũ Luda kiiaro, zaake Ludaa bè Ibraĩne, Isaaku boriinŋ weégae beńne à boriinŋ ũ. <sup>8</sup> Leme èe ke né kè à n̄ í pɔyezionŋn Luda nénŋ ũro, né kè à n̄ í Luda légbēna musunŋn borii pìnŋ ũ. <sup>9</sup> Zaake Luda lé gbē à bè: Mée ɛara mà mó zii mōndaa'i, Sara é né i gŋgbē ũ. <sup>10-12</sup> Èe ke beee adoro. Luda è gbēnŋ sé lán èe weteɛ nàme, èe ke aŋ yākena yānzinlo, kè à n̄ sísi yānzime. Leme kè Rebeka sikanŋ nò sì kōn wa dezi Isaakuo, ai àgŋ gá n̄ i, ai aŋgŋ gá à maa ke à zaaa ke, Luda bè Rebekane, à kè bò káaku égŋ né ũ gbē zāane. <sup>13</sup> Lán wà kè Luda yān nà wà bè:

Má ye Yakubuzi,  
Isau sŋ, ma gizi.

14 Wé be diamε? Yã zaaa kú Luda kiian yó? Lenlo fá! 15 Zaake à bè Musanε, gbē kè á yezi à sùu keon é keo, bensō gbē kè á yezi à wēnda dōnen é dōne. 16 Beee yānzi Luda gbēno sena e bo gbēnteenō poyezi gāzīro ke aō aīakenan, à bō Luda sùu guume. 17 Zaake Ludaa ò Fili'aunanε a yān à bè: Ma n ka kpatan le mà a gbāaa doo gbēnoε n musume, wà ma tó kpá anduna guu píngi. 18 Lemε gbē kè à yezi à sùu keon è keo le, bensō gbē kè à yezi à à swā gbāgbān è gbāgbā.

*Luda pɔfɛ kɔn à sùuo*

19 A gbēke é ma la, bóyānzi Ludaa e gbēno taari eezi doo? Dé bé eé fō à gí Luda poyezizi? 20 N gbēntee ina, dén n ũ gbasà n yā sí Ludalaa? Oroo é a bōri la à be: Bóyānzi n ma bo lán kè bàzió? 21 Orobori zé vī à oro swāde kōn à swāsaio bo kōn gù dōnkō kè à tòtooroo? 22 Tó Ludaa yezi à a pɔfɛ dooanε le aō a gbāaa dō, ben à mena bíta kè kōn gbē kè aō de à pɔfɛ pitańma à n kaatenō sō né! 23 Tó à beee pì kè, le wamowa kè à sùu kèwaonō a gakui bíta dō sō né, wamowa kè à gīake à wa keke le wà gē a gakui pì guunō! 24 Gbē kè Luda n sísí à n sé pìnōn wa ũ. Èe ke Yudanome ntēero, kōn bori pāndenōme se. 25 Lán Ludaa bè annabi Osea takadan nà Borii kè aō de ma gbēno ũroonōn mé beńne ma gbēno.

Borii kè má yeńziroonōn mégō yeńzi.

26 Gura kè Luda bèńne aō de a gbēno ũro, gwen weé n sísí Luda Wēndide pì néno.

27 Isaya wii lè Isarailinō yā musu à bè: Baa tó Isarailinō pari

lán ísiale bùsu'ãatē bà,  
aõ kpaaa kè gõ bé eé bõ.

<sup>28</sup> Zaake Dii é yã kè à ò ke anduna guu,  
bensõ eé à mì de zena saime.

<sup>29</sup> Lán Isaya gĩake à bè nà:

Tó Dii Zìkpedee e wa bori kenõ tó yãro,  
le wa gõ lán Sõdõmudeeno bà,  
le wa ke lán Gõmõradeeno bà.

### *Isarailinõ gina Kirisi baaruzi*

<sup>30</sup> Wé be diame saa? Bori pãndenõ e wete Luda tó yã bõnyo nnaro, ben à tò à bõnyo nna. À tò yã bõnyo nna a náane kè aõ kè yãnzì. <sup>31</sup> Isarailinõ sõ e wete Luda tó yã bõnyo nna doka musu, ben è bõnyo nnaro. <sup>32</sup> Bóyãnzii? Kè aõ yezi Luda tó yã bõnyo nna n yãkenaa yãnzime, è ke à náanekena yãnzinlo. Aõ gèn sì gbè kè è n pãea <sup>33</sup> lán wà kè Luda yã nà:

N gwa, mée gbè kè è tó wà gèn sí die Zayõn,  
gbèsi kè è tó wà fuu.

Wí é gbè kè à à náane kè kũro.

## 10

<sup>1</sup> Ma gbẽnõ, yã kè má yezi ma swè guu mée a wée kee Ludaan Isarailinõ mìsina ũ. <sup>2</sup> Mé fõ mà n sèda ke kè aõ aĩa vĩ kõn Luda yão, mõde aõ wée kẽnaro. <sup>3</sup> Zaake aõ dõ dian Luda è tó yã bõnyo nna nàro, ben aõègõ wete yã bõnyo nna kõn n zĩnda gbãaaõ. Dian Luda è tó yã bõnyo nna nà, aõõe síro. <sup>4</sup> Zaake Kirisi Musa doka lé pàpa, le yã bõ kõn gbè sãnda píngi kè à à náane kèõ nname.

### *Mìsina né gbè píngi pómè*

<sup>5</sup> Dian doka è tó yā bɔ́nyo nna nàn Musa ò a takadan à bè, gbě kè yā pì kè bé é wèndi e à guu.

<sup>6</sup> Dian ludanaanekena è tó yā bɔ́nyo nna nà kēna à yān à bè:

Ñton o n nòsen ñ be,  
dé bé eé gá ludambe à Kirisi pitaro,

<sup>7</sup> ke dé bé eé gá gèwāan à Kirisi bɔ gaanlo.

<sup>8</sup> Yā kè à òn yè:

Yā pì kúnyo kīi,

à kú n lén kōn n nòseo.

Ludanaanekena yā kè weè à waazi keen yā pì ũ.

<sup>9</sup> Tó ñ ò kōn léo gupuraa kè Yesun Dii ũ bensō ñ sì n swèn kè Luda à bò gaan, eé n mì sí. <sup>10</sup> Zaake yā pì sina n swèn bé è tó yā bɔnyo nna bensō yā pì ona kōn n léo bé è n mì sí. <sup>11</sup> À kēna Luda yān wà bè, wí é gbě kè èe à náane kee kū zikiro.

<sup>12</sup> Yudanɔ kōn bori pāndenɔ e bɔ doodo kōoro, zaake aō píngi Dii dōnkōme, è kaarana ke gbě kè aōè à sísinɔne ñ píngi. <sup>13</sup> Zaake Dii sísirinɔ é bɔ ñ píngi. <sup>14</sup> Dian gbēnɔ é à sísi à náanekena saii? Dian aōé à náane ke à yāmana saii? Dian aōé à yā ma waazikeri saii? <sup>15</sup> Tó wèe waazikerinɔ zīm̄maro, dian aōé waazi keíne nà? À kēna Luda yān wà bè: Baarunnakparinɔ m̄na è keíne nna fá! <sup>16</sup> M̄de èe ke baade píngi bé à baaru nnaa pì sìro. Ben Isaya bè: Dii, dé bé à wa yā s̄i? <sup>17</sup> Lem̄e ludanaanekena è bɔ à yāmana kiiame, yā pì s̄s̄ né Kirisi yāme. <sup>18</sup> Ma bè yóó! Aōe manloo? Aōo mà.

Aō kòto dà andunala píngi,  
aō yā'ona gàa ai t̄ote lézekiia.

<sup>19</sup> Ma bè yóó! Isarailinɔ e d̄roó? Káaku ḡia Musa bè:

Mé tó aǎ nǎseǎaano kpá kǎn borii kè aǎo de ma gbě  
ũroono,

mé tó aǎ po fě gběntee wéesiadeeno yá musu.

<sup>20</sup> Ben Isaya Luda yá ò kǎn kù gbáaao à bè:

Gbě kè aǎo ma kii weteroono bé wà ma e,  
ma a zĩnda òdɔa gbě kè aǎo ma gbekaroono.

<sup>21</sup> Isarailino yá musu à bè:

Zaa kongo ai uusie ma ɔ dò

bori swāgbāadee kè aǎ fěmaono.

## 11

### *Ludaa e Isarailino zĩnnaro*

<sup>1</sup> Ma bè yóo! Luda a zĩnda gběno zĩnnan yó? Lenlo fá! Mapi, Isarailin ma ũ. Ibraĩ boriin ma ũ Beyāmi borii guu. <sup>2</sup> Ludaa e a gbě kè à gĩake à n dõno zĩnnaro. Á Ilia yá kè kēna Luda yān kèkii dõroo? Kè à gàa kǎn Isarailino yāo Luda kiia, à bè: <sup>3</sup> Dii, aǎ n annabino dède aǎ n gbāgbākiino gbòro. Mámbe ma gō mado, ben aǎo ma wεε. <sup>4</sup> Luda bè Ilianε diamε? À bè, á gbě kè aǎo kúε Baalinerono kũna a pó ũ gõon boro swεεplaa. <sup>5</sup> Lemε do aǎ gbě kpaaa kè Luda n sé a gběkeε guuno kpé kuu ai gbāa. <sup>6</sup> Lán à n sé a gběkeε guu nà, èe ke aǎ yākena yānzinlo. Tó lenlo, èndě Luda gběkeε égō gběkeε ũro. <sup>7</sup> Dian gwee? Isarailino e yá kè wèe wεε ero, mode aǎ gbě kè Luda n sɛno è. Aǎ gbě kè aǎ gõno nǎse tàta, <sup>8</sup> lán à kēna Luda yān nà wà bè:

Luda iwesaa kpànzi,

ben aǎ wéε e guu ero,

aǎ swā e yá maro ai kǎn a gbāao.

<sup>9</sup> Dauda bè do:

Aǎ zĩbaakena gõne takutε ũ à n kũ,

à gǔńne gènsikii ũ Ƽ à yǎ lúńne.

<sup>10</sup> Aǎ wéƼ sisi Ƽ aǎton guu ero,  
aǎ wó gǔ kokona gurǔ pínɡi.

<sup>11</sup> Ma bè yóǎ! Kè Isarailinǔ gèn sì, aǎ Ƽè mámman yó? Ƽenlo fá! Aǎ taarinǔ yǎnzin Luda bori pǎndenǔ mì sìzi, Ƽ Isarailinǔ nǔseɡǔaanǔ kpáyó yǎnzi. <sup>12</sup> Lán aǎ taarinǔ bé à tò anduna kaarana è nà, bensǔ aǎ funa bé à tò bori pǎndenǔ kaarana è, weé n Ƽ papana yǎ o dǔǔ?

### *Bori pǎndenǔ m̀sina*

<sup>13</sup> MƼƼ yǎ oo a bori pǎndenǔne sa. Lán má de z̀iri ũ bori pǎndenǔ kiia nà, mƼƼ Ƽa dǎ ma z̀irikƼ yǎ musu, <sup>14</sup> Ƽ mà a z̀inda boriinǔ nǔse ƼƼ aǎ nǔseɡǔaanǔ kpá mà n gbƼkenǔ mì sí. <sup>15</sup> Zaake Luda gina Isarailinǔzi bé à tò anduna k̀eo nna, tó à Ƽara à n sí dǔ, beee éɡǔ de diamƼ? Beee éɡǔ de ẁendi ũ g̀enǔne.

<sup>16</sup> Tó wà pó dufu dàƼ, à kpaaa g̀ǔ aubarika pó ũmƼ. Tó lí kǎsǎa de Luda pó ũ, à g̀anǔ de à pó ũmƼ se. <sup>17</sup> Luda kù lí yǎpura g̀ǎ kenǔ z̀ǔz̀, ben à mm̀on k̀è n de k̀utƼ lí ũu p̀è à gb̀en, Ƽ nǔgǔ kuu k̀on kù lí maaa kǎsǎ gbǎaaao. <sup>18</sup> Ǹton kya ká kù lí yǎpura g̀ǎ k̀è à z̀ǔz̀onlo. N ke dia nƼƼ Ƽa dǎa? N kuu lí kǎsǎa yǎnzime, èe ke lí kǎsǎa bé à kuu n yǎnziro. <sup>19</sup> Né be, à lígǎ p̀inǔ z̀ǔz̀ Ƽ à n pé n gb̀en yǎnzime. <sup>20</sup> ƼemƼ, m̀ode à n z̀ǔz̀ k̀è aǔƼe a náane kero yǎnzi. Mm̀on s̀s, n zekii è k̀è nƼƼ Luda náane keƼ yǎnzi. Ǹton wada kero. Ǹ Ƽaakari ke! <sup>21</sup> Lán Ludaa e g̀i kù lí yǎpura g̀anǔ z̀ǔz̀ziro nà, eé g̀i n z̀zi sero. <sup>22</sup> Ǹ gwa lán Ludaa maa nà bensǔ à pǎs̀i. À pǎs̀i k̀on gb̀Ƽ k̀è aǎ f̀uanǔ, ben à maanne, tó n ze k̀on à

maakenao. Tó lenlo, eé n zõme se. <sup>23</sup> Tó Isarailinŋ ñ ludanaanekesai tò, eé ɛara à ñ pé ñ gbèmmɛ, zaake à ñ pena ñ gbèn gbãa vĩ. <sup>24</sup> Tó Luda n zõ kùtɛ lía à n pɛ kù lí yãpuraa lán wè kero nà, kù lí gã yãpuraano ɛara à pena ñ zĩnda lía zé vĩ de beelaroo?

### *Isarailinŋ m̀sina zãa*

<sup>25</sup> Ma gbɛnŋ, má yezi àgõ asiiyã kèkii dõ, le a wée tóngõ sia à a zĩnda die ñadãrinŋ ũro yãnzì. Isaraili kpaaanŋ swãgbãa kù gĩa ai bori pãndenŋ gëna kpata kè b̀ Luda kiia guu lé gõ ká. <sup>26</sup> Beee gbɛra Luda é Isarailinŋ mì sí ñ píngi lán à këna Luda yãn nà kè wà b̀:

Misiri é b̀ Zayɔn,

eé Yakubu boriinŋ kè ludadõsaia.

<sup>27</sup> Ma bà kuunaño yãn gwe gurŋ kè mé ñ durunŋ kèñne.

<sup>28</sup> Baaru nnaa pì yã musu aõ de Luda ibɛenŋ ũ a yãnzì. Luda gbɛnŋ sɛna yã musu aõ de Luda yen-zideenŋ ũ aõ dezinŋ yãnzì. <sup>29</sup> Zaake ludangbaanŋ kɔn gbɛ kè à ñ sísi à ñ sɛnŋ è sí liero. <sup>30</sup> A bori pãndenŋ ée Luda yã ma yãro. Tia sa Luda sùu kèao kè Isarailinŋ e à yã maro yãnzì. <sup>31</sup> Len Isarailinŋ gì Luda yã mazi le tia, le Luda e à sùu kèao, gbasà à sùu kèño. <sup>32</sup> Luda yãmasai kpà gbɛ sãnda píngizi, le à e à sùu kèño ñ píngi yãnzime.

### *Luda sãabukpana*

<sup>33</sup> Luda ñndõ kɔn a dõnao bítakee kà zã fá.

Gbɛke é f̃ à b̀ yã kè à zèo asiiaro,

wéé f̃ wà à d̀ro d̀ro.

<sup>34</sup> Dé bé à Dii ǹsɛ dõ?

Dé bé à yã dànɛ à lédamhari ũu?

<sup>35</sup> Dé f̃ia bé à d̀ Luda kè eé bonɛ?

36 Pó píngi bò à kiiame,  
 aõ kuu kõn à gbãaa,  
 bensõ aõ kuu à pó ũ.  
 Wàgõ à tó bõ guro píngi. Aami.

## 12

### *Zíkèna Ludanè*

<sup>1</sup> Beee yãnzì ma gbẽno, lán Luda wa wẽnda dõ læ nà, ma wée kèawa à a zĩnda kpáa sa'opo bẽe seesai kè è káne ũ. Àmbe a dõnzikèna a zéa ũ. <sup>2</sup> Àton té anduna tiaa kè tuubaziro. À tó Luda a dà liè, a làakari e à gõ dufu, læ à e à à poyezi dõ, yã kè maa, ben à nna, ben à papana.

<sup>3</sup> Gbaa kè Ludaa dàme yãnzìn mée oo a pínginezi, àton a zĩnda maa bo de a maa lélaro. A baade a zĩnda diè a yãpura lén lán Luda à gbà zé à a náane ke nà. <sup>4</sup> Gbẽntee mè mèn doo guuno vĩ pari, aõ baade kõn a zĩiome. <sup>5</sup> Leme, baa kõn wa parikèeo, wa mè dõnkõ Kirisi guume, mègu daanon wa ũ. <sup>6</sup> Wa gbaa bò doodo kõne lán Ludaa dàwe nà a gbèkèe guu. Tó annabikèyã'ona gbaan ní vĩ, n ke n ludanaanekèna lén. <sup>7</sup> Tó zirikèeme, n ke. Tó yãdannename, n dañe. <sup>8</sup> Tó lédammaname, n dañma. Tó gbadaname, n da aaga. Tó dõn'aedekèeme, n ke kõn aiao. Tó wẽndadõnnename, n dõhne kõn ponnaao.

<sup>9</sup> À kõ sio yenzi gõ mõnafiki sai. À kpèe li à zaaane, à ze kõn à maaao. <sup>10</sup> Àgõ nna kõo kõ gbẽno ũ. Àgõ wãa kõn bèelikõnènao. <sup>11</sup> Àgõ aia vĩ meà sai, a mè gõ wãa Dii zĩ guu. <sup>12</sup> À ponnaa ke yã kè a wée dõzi yã musu. À mena fõ nawèakèna guu. À mè kpá aduakènaa. <sup>13</sup> À dõnle ke Luda gbè kè pó e



kēsāarmanɔne. Àgae nibɔ ke. <sup>14</sup> À sa maaa o a wétāmmarinɔne. À sa maaa oíne, àton ní káro. <sup>15</sup> À pɔnnaa ke kɔn pɔnnakerinɔ. À ɔɔ dɔ kɔn ɔɔɔrinɔ. <sup>16</sup> Àgɔ kú kɔo nna. Àton a zĩnda sé lezĩro. À gbēna kpá kɔn takaasideenɔ. Àton a zĩnda die yādɔrinɔ ũro. <sup>17</sup> Àton yā zaaa fīa bo kɔn à zaaaoro. Àgae yā kè maa baade pĩngine ke. <sup>18</sup> Tó eé sí ke, tó á à zé vī, àgɔ nna kɔn gbē sānda pĩngio. <sup>19</sup> Ma gbē yenzideenɔ, àton gēe bo gbēaro, à à tó kɔn Ludao. À kēna Luda yān wà bè:

Dii bè, ambe é gēe bońma,  
ambe é fīa bońma.

<sup>20</sup> Tó nɔaa e n ibee dee, n póblee kpáa. Tó ímiime sɔ, n à gba í. Tó ní kè le, née à ɔɔ kaane a lémmē. <sup>21</sup> Nton tó yā zaaa zĩ blemmaro. N zĩ blea kɔn à maaao.

## 13

### *Misiēna b̀usu gbāadeenɔne*

<sup>1</sup> Baade pĩngi mì sie b̀usu gbāadeenɔne, zaake iko kee kuu Luda lé saero. Luda bé à gbāadee kè aɔɔ kuunɔ die ní pĩngi. <sup>2</sup> Beee yānzi gbē kè b̀ò gbāade yā kpee, adee b̀ò Luda yādiēna kpeeeme. Gbē kè b̀ò ní kpeeɔ ní zĩnda dà yāmmē. <sup>3</sup> Èe ke maakerinɔ bé wè vīa ke kpatablerinɔero, sé zaakerinɔ. Tó ní yezi gbāadeenɔ vīa dadanziro, n yā maaa ke, eé n sáabu kpá. <sup>4</sup> Gbāadee né Luda zĩkerime n aafia yānzi. Tó n yā zaaa kè sɔ, n vīa kene, zaake à fēdaa logona pānlo. Luda zĩkerime, è gēe bone zaakeria. <sup>5</sup> Beee yānzi à maa à mì sieńne. Èe ke wétāmma yānzi adonlo, a laasuu yānzime dɔ. <sup>6</sup> Beee yānzin eè be'ɔɔ kpázi dɔ, zaake gbāadeenɔ né Luda zĩkerinɔme, aɔɔe

zĩi pì keεneμε. <sup>7</sup> À baade fĩa bońne píngi. À be'ɔɔ kpá à sĩa, à a laaanɔ takada sí dɔ. À mì sie gbẽ kè de à mì sienene. À gbẽ kè de à à yã da yã da.

### *Gurɔɔ kà kĩ, wàgɔ yekɔzi*

<sup>8</sup> Àton gbẽke fĩa séro, sé yekɔzina fĩa baasiro. Gbẽ kè ye a gbẽdaaazi, Luda doka pèkɔreamε. <sup>9</sup> Wà bè ñton zina kero, ñton gbẽ dero, ñton kpai oro, ñton gbẽ pò ni dero. Yã pìno kɔn yãdiena pãnde kè aɔɔ kuunɔ píngi kú yã kèkii guume wà bè: Ñgɔ ye n gbẽdaaazi lán n zĩnda wèndi bà. <sup>10</sup> Yenzi è tó gbẽ yã zaaa kè a gbẽdaaanero. Yenzin Luda doka papana ũ.

<sup>11</sup> À ke le, zaake á gurɔɔ kè wá kúa kè dɔ. A vuna iin gurɔɔ kà, zaake wa mĩsina kĩ tia de gurɔɔ kè wa Yesu náane kèla. <sup>12</sup> Guu sɔ à kà zã, gudɔna kà kĩ. Wà mì kè gusia yãnoa wà gupura gɔkɛbɔno sée. <sup>13</sup> Wàgɔ kú wa dɔroa fãantẽ gbẽno ũ faasai kɔkɔ kɔn wèdenao sai, pãpãkena kɔn wĩsaiyãno sai, leokpakɔa kɔn zanguo sai. <sup>14</sup> À Dii Yesu Kirisi zékpae sé. Àton tó a dà zii dɔare ae à à nidena kero.

## 14

### *Kɔ taari'ena*

<sup>1</sup> À gbẽ kè buse ludanaanekena guu die yãkete sai. <sup>2</sup> Gbẽkeno ludanaanekena è pòke tè boro, ben gbẽ kè aɔ ludanaanekena busananɔ è nòbo sóro. <sup>3</sup> Gbẽ kè è pò píngi ble tón kya ká gbẽ kè è pò píngi bleroonlo, bensɔ gbẽ kè è pò píngi bleroo tón gbẽ kè è pò píngi blee taari ero, zaake Luda à sìme. <sup>4</sup> Dén n ũ kè née danɔ zĩkeri taari ee? Tó à fɔ ke à fũan yoo, à Dii yãn gwe. Eé fɔ, zaake Dii gbãaa é tó à fɔ. <sup>5</sup> Gbẽkeno

sì kè gurɔ kenɔ nna de à kenɔla, gbẽ pãndenɔ sì kè gurɔ píngi sáame. Baade laasuu gɔ dɔnkɔ kɔn yã kè à zèoo. <sup>6</sup> Gbẽ kè è gurɔɔ bɔɔ è bɔ Dii yãnzime. Gbẽ kè è pɔ píngi blee è ble kɔn Dii gbãaaome à Luda sáabu kpá. Gbẽ kè è pɔ tẽ è tẽ Dii yãnzime à Luda sáabu kpá. <sup>7</sup> Gbẽke ègɔ kuu a zĩnda yãnziro, gbẽke è ga a zĩnda yãnziro. <sup>8</sup> Tó wá kuu, wá kuu Dii pɔ ùme, tó wa ga, wa ga Dii pɔ ùme. Wá kuun yoo, wa gan yoo, wá de Dii pɔ ùme. <sup>9</sup> Zaake Kirisi gà à fêe, le àgɔ de gèwãadeenɔ kɔn gbẽ bẽenɔ Dii ùme. <sup>10</sup> Kè née n gbẽndoo taari ee sɔ né? Mmɔn sɔ, à kè dia née kya kaa n gbẽndoon sɔɔ? Luda égɔ v̄ena a tintia, wa píngi wé bɔ wà ze à ae, <sup>11</sup> lán à k̄ena Luda yãn nà Dii bè:

Kɔn ma kuunao, baade píngi é kúeme,  
gbẽ sãnda píngi é ma ludakεε d̄s.

<sup>12</sup> Len baade é a zĩnda yã t̄k̄ẽ Ludanε le.

### *Àton yã kè eé tó a gbẽndoo fuu kero*

<sup>13</sup> Beee yãnzì wàton kɔ taari e d̄oro. Kè de à kɔ taari e, à zεo kè é yã kè eé tó a gbẽndoo fuu kero. <sup>14</sup> Dii Yesu guu má d̄s sãnsãn kè pɔble ke ègɔ gbãsi a zĩndaro. M̄ode tó gbẽ diε kè pɔ gbãsi, ben ègɔ gbãsīne. <sup>15</sup> Tó n n gbẽndoo n̄se yàkanε pɔ kè n blè yãnzì, n̄ yenzì v̄inero. Pɔblee kè n̄ blè yãnzì n̄ton gbẽ kè Kirisi gà à yãnzì kaatero. <sup>16</sup> Àton tó wà kya káare pɔ kè á è à maanlo, <sup>17</sup> zaake kpata kè b̄ò Luda k̄ia né pɔblena kɔn íminao yãnlo. Yãkena a zéa kɔn aafiao kɔn p̄onnaa kè Luda Nini è īn̄neo yãme. <sup>18</sup> Gbẽ kè èe d̄ɔ Kirisizì lán beee bà yã è ká Ludanε, bensɔ gbẽntee è à sáabu kpá. <sup>19</sup> Beee yãnzì wàgae kɔ aafia wetε wàgɔ kɔ s̄εε lez̄i. <sup>20</sup> N̄ton Luda z̄i yaka pɔblee yãnzìro. Pɔble píngi maame, m̄ode pɔ

kè eé tó n gbēndoo fuu blena maaro. <sup>21</sup> Nòbɔsonan yoo, wēminan yoo, yā kè eé tó n gbēndoo fu pínɡi, à maa ò tēmε. <sup>22</sup> Pó kè ò náanε kè, ò tó à gōnne kōn Ludao. Aubarikadeen gbē kè èe a zīnda taari e kōn pó kè à zèoroo ũ. <sup>23</sup> Tó gbē e seka keε póblee kè èe bleea sō, à a zīnda dà yāmmε, kè èe kō sé kōn à ludanaanekenaoro yānzi. Yā kè èe kō sé kōn gbē ludanaanekenaoroo né durummε.

## 15

### *Wàgō yekōzi wéedɔna Ludazi guu*

<sup>1</sup> Wamɔwa kè wá gbāa ludanaanekena guuno, séde wà gbē kè aō gbāaroonɔ sé lezī aō gbāasaikεε guu. Wátongae wa poyezi kero. <sup>2</sup> Wa baade gae yā kè eé ke a gbēdaanε nnaa ke à bɔna maaa yānzi kōn à kāsāpεεnao. <sup>3</sup> Zaake Kirisi e a zīnda poyezi kero. À kēna Luda yān wà bè, gbēnɔ dɔkεna Ludao gōnε. <sup>4</sup> Yā kè wà kè yā pínɡi, wà kè lédanawaa yānzimε. Luda yā pì è wa gba mena, è wa gba swè le wàgō tāmaa vī. <sup>5</sup> Luda kè è ò gba mena à ò gba swè tó àgō nòsedōnkō vī kōo lán Kirisi Yesu pó bà, <sup>6</sup> le à Luda wa Dii Yesu Kirisi De tó bɔ kōn nòse dōnkōo kōn ledoleo.

<sup>7</sup> À kō sí lán Kirisi a si nà Luda tóɔna yānzi. <sup>8</sup> Mée ooare, Kirisi gō zīri ũ Yudanɔnε, le à lé kè Ludaa gbē aō dezinɔnε papa, aōgō dō kè Luda náanε vī, <sup>9</sup> le bori pāndenɔ Luda tó bɔ à sùu yānzi lán à kēna Luda yān nà wà bè:

Beee yānzi mé n sáabu kpá boriinɔ té,  
mé n tó kpá.

<sup>10</sup> Wà bè dɔ:

Boriinɔ, à pɔnnaa ke kōn Luda gbēnɔ.

11 Wà bè dɔ:

Amɔa bori píngi à Dii tó kpá,  
amɔa bùsu píngi gbēnɔ à à táaki lé.

12 Isaya bè dɔ:

Yεεε kāsāa é pìto pá,  
eé fεε à kí ble bori pāndenɔne,  
aǎégǔ wée dɔɔzi.

13 Luda kè gbē píngi wée dɔzi tó pɔnnaa  
pèkǔreawa kǔn aafiao a náane kè ée keε yānzi,  
lé a wéedɔzina kaara kǔn à Ninii gbāāao.

### *Pɔlu zĩkena Ludane*

14 Ma gbēnɔ, má dǔ sǎnsǎn kè maakeε pèkǔreawa,  
á yǎ píngi dǔ wásawasa, é fǔ à lé dakǔa. 15 Ma takada  
kè kēna guu ma yākenɔ kè kǔn kùgbāāao diena, lé  
àgǔ dɔagu yānzi, zaake Luda ma gba zé 16 ma gǔ  
Kirisi Yesu zĩkeri ũ bori pāndenɔne. Mée baaru  
nnaa kè bò Luda kiia kpaañne, lé aǎ kuuna gǔ adona  
Luda Nini gǎzĩ, aǎ gǔ Ludane sa'obo kè è keε ũ.  
17 Kuuna Kirisi Yesu guu mée ãa dǎa zĩi kè mée keε  
Ludane yǎ musu. 18 Zaake má yǎke ona vĩro, tó  
èe ke yǎ kè Kirisi kè ma kiia baasiro. À tò bori  
pāndenɔ Luda yǎ mà ma yǎ'ona kǔn ma yākenao  
gǎzĩ 19 kǔn sèedanɔ kǔn dabudabuyǎnɔ gbāāao kǔn  
Luda Nini gbāāao. Bona Yerusalemu ma liga wéte  
kǔn wéteo ai Ilirikumu bùsun, ma Kirisi baaru  
kpàakpa kè papana. 20 Mèègǔ yezi mà baaru nnaa  
pì kpá guu kè wée Kirisi yǎ man zikiro, lé màton bú  
ba gbē pānde pò gbènlo yānzi. 21 Lán à kēna Luda  
yǎn nà wà bè:

Gbē kè wée à yǎ oñne yǎroonɔ wée é kē,  
gbē kè aǔe à baaru ma yǎroonɔ é dǔrɔ dǔ.

22 Yã kè ègõ kpaa ma mɔna a kiiane gèn baaagõn gwe. 23 À kà wè ùgbangba kè mèègõ yezi mà mó a gwa. Tia sa lán yákee e gõme bùsu kèkiino guu dɔro nà, 24 má tãmaa vĩ wà wée sikõle sa ma gana Sapaini bùsun guu. Tó ma gurɔplaa kèao kɔn pɔnnao, é zé keme gana gwe. 25 Tia la mée gaa kɔn dɔnlɛo Luda gbɛnɔne Yerusalemu, 26 zaake gbɛ kè aõ kú Masedonia kɔn Girisino zèo wà Luda gbɛ takaasidee kè aõ kú Yerusalemunɔ kámasa ke. 27 Aõ zèo, mɔde tiasime, zaake lán Yudanɔ Luda auziki li bori pãndenɔzi nà, à maa bori pãndenɔ n anduna auziki li Yudanɔzi se. 28 Tó ma gbaa pì nàñne n zĩ ma yãa, ma gana Sapaini guu mé bɔe a kiia. 29 Má dõ kè tó mé mó a kiia, mé móare Kirisi aubarikao papaname.

30 Ma gbɛnɔ, ma naare wa Dii Yesu Kirisizi kɔn yenzi kè Luda Nini è kpámmao, à fɛe à ze à Luda wée kɛmao, 31 le à ma bɔ Yudea Yesusaideenɔ zĩ, le zĩ kè mé ke Yerusalemu Luda gbɛnɔ té keñne nna, 32 gbasa mà a le kɔn pɔnnao, tó Ludaa wè, mé mó kámma bo a kiia. 33 Luda Aafiade gõ kúao a píngi. Aami!

## 16

### *Ìkpammana*

1 Mée wa dãre Febe, Kenkerɛa sɔsi dɔnlɛri naaare a zĩ. 2 À à sí Dii guu, lán à maa Luda gbɛnɔ ke kɔo nà. À dɔale kɔn pɔ kè à yezi a kiiao píngi, zaake à dɔ gbɛnɔle pari kɔn mapio se.

3 À ì kpá Pirisila kɔn Akilaoa. Ma zĩkeri daanɔme Kirisi Yesu zĩ guu. 4 Aõ sì wà n zĩnda da kari guu

ma yānzi. Èe ke māmbe madoro, bori pānde s̄sino gbēn̄o e n̄ s̄abu kpaa p̄ngi d̄o.

<sup>5</sup> À ì kpá s̄osi gbē kè āèḡō k̄ō kaak̄ōa āō b̄eε guun̄o.

À ì kpá ma gbē yenzide Εpen̄tua, àm̄o kè à Kirisi náan̄e kè Asia b̄usun k̄áaku.

<sup>6</sup> À ì kpá Mariamaa, àm̄o kè z̄i kèare maamaa.

<sup>7</sup> À ì kpá Andar̄nikua k̄ōn Yuniao. Ma bori daa kè wà wa da kp̄esiaan ledoon̄om̄e. Āō t̄ó b̄ò Luda z̄irino t̄e bens̄o āō kú Kirisi guu ma ā.

<sup>8</sup> À ì kpá Ampliatu kè de ma gbē yenzidee ũ Dii guua.

<sup>9</sup> À ì kpá Ubanu kè de wa z̄ikeri daa ũ Kirisi z̄i guua k̄ōn ma gbē yenzide Satakio.

<sup>10</sup> À ì kpá Ap̄eε kè à z̄ena gb̄aa Kirisi guua.

À ì kpá Arisit̄bulu b̄edeen̄o.

<sup>11</sup> À ì kpá ma Yuda daa Her̄ōdīōa.

À ì kpá Nasisu b̄edee kè āō kú Dii guun̄o.

<sup>12</sup> À ì kpá Tirifenaa k̄ōn Tirifosao. N̄ogbē p̄ino è z̄i ke Diine maamaa.

À ì kpá P̄esia. N̄ogbē yenzidee p̄i z̄i kè Diine maamaa.

<sup>13</sup> À ì kpá Rufu kè b̄ò ado Dii z̄i guua k̄ōn à da kè m̄eε gwaa ma da ũuo.

<sup>14</sup> À ì kpá Asinkiritua k̄ōn Fleḡō k̄ōn Emesio k̄ōn Patarobao k̄ōn Emasio k̄ōn n̄ Yesude daa kè āō kú ledoon̄o n̄ p̄ngi.

<sup>15</sup> À ì kpá Fil̄b̄ogua k̄ōn Yuliao k̄ōn Ner̄euo k̄ōn à d̄areo k̄ōn Olimpao k̄ōn Luda gbē kè āō kú ledoon̄o n̄ p̄ngi.

<sup>16</sup> À ì kpák̄ōa k̄ōn Luda gbēn̄o lép̄emmanao. Kirisi s̄sino ì kp̄àawa n̄ p̄ngi.

*Lézamma*

<sup>17</sup> Ma gbēnɔ, mée ooare à làakari ke gbē kè aǎ bò yǎ kè á dàda kpεεnɔzi. Aǎ gbēnɔ kēkōa wà gbēnɔ sāsā. À kēm̄ma, <sup>18</sup> zaake gbē beee takanɔ è dɔ wa Dii Kirisiziro, sé n̄ gbεε yǎ. Aǎ taarisaideenɔ sāsā kōn lénnaao kōn yǎd̄ɔ. <sup>19</sup> Baade p̄ngi a m̄siena Diine baaru mà. Mée p̄nnaa keε a yǎ musu. Má yezi àḡɔ à maa ɔnd̄ɔ v̄i àḡɔ taarisaideenɔ ũ à zaaa musu. <sup>20</sup> Luda Aafiade é Setān dúgu z̄ɔ a gbá ḡiz̄i tia. Wa Dii Yesu gbēkeε keare.

<sup>21</sup> Ma z̄ikeri daa Tim̄oti kōn ma bori daanɔ Lusiu kōn Yas̄o kōn Sosipatao ì kpàawa.

<sup>22</sup> Mam̄ma Tetiu kè ma takada kè kè ì kpàawa Dii guu.

<sup>23-24</sup> Ma b̄dee Gayusi kè s̄osi gbēnɔ è kakōa à bεε ì kpàawa. Wéte ɔ'uteri Erasatu ì kpàawa kōn wa gbēndo Kaatuo.

*Luda t̄b̄na*

<sup>25</sup> Tia sa Luda é f̄ɔ à a gba gbāa kōn Yesu Kirisi baaru nnaa kè mée kpaaɔ, lán asiiyǎ kè utena zaa tontori kè wà bìiamεεo de nà. <sup>26</sup> Luda kè èḡɔ kuu gurɔ p̄ngi diε wà yǎ kè kēna annabinɔ takadanɔ guu p̄i b̄ɔ gupuraa sa, le bori p̄ngi e à d̄ɔ aǎ Luda náane ke aǎ ḡɔ à yāmarinɔ ũ. <sup>27</sup> Wà Luda mèn do ɔnd̄ɔde t̄ɔ b̄ɔ Yesu Kirisi ḡaz̄i ai gurɔ p̄ngi! Aami.



**Luda yá takada kǝn Bokobaru yáo**  
**The New Testament and portions of the Old Testament**  
**in the Bokobaru language of Nigeria**

copyright © 2005 SIM International

Language: Bokobaru

Translation by: SIM

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-09-22

---

PDF generated using Haiola and XeLaTeX on 11 Nov 2022 from source files dated 9 Oct 2020

c31548a1-5316-53c2-be42-674e0e4c5ae5